

# 1 & 2 Reinan

E bukinan di “Reinan” ta un relato di historia di e pueblo hebreo kuminsando ku transishon di e reino di Israel for di David pa Salomon i kabando ku un relato kortiku di Joakin durante eksilio di Juda. Esaki ta enserá un periodo di mas ku kuater síglo, for di 970 te 561 B.C.

E buki ta kuminsá unda 2 Samuel 20 a klousurá...durante un era di prosperidat, rikesa, i lógronan religioso ora Salomon a bira rei. Ma pa motibu di Salomon su piká, e reino a wòrdu dividí: Israel i Juda. E buki ta klousurá ku tantu Israel komo Juda den eksilio. Na komienso di e buki, Salomon ta konstruí e tèmpep. Na final di e buki, Babilonia ta destruí e tèmpep.

E tera ku e pueblo hebreo a habitá tabata lokalísá meimei di e dos kulturanan mas poderoso di e mundu konosí: Egipto i Mesopotamia. Durante era di Saul i David, e dos nashonnan aki tabata debil. Ma den e buki di Reinan, e dos potensianan aki tabata aktivo. Rípidamente nan a pone preshon riba e pueblo di Dios. Porfin Asiria (lokalísá na Mesopotamia) a konkistá e nashon di nort, Israel, na aña 721 B.C. E nashon di sùit, Juda, a sobreviví te 586 B.C., ma porfin e tambe a wòrdu konkistá dor di Babilonia, un otro impero ku a lamta su kabes na Mesopotamia.

Manera 1 i 2 Samuel, e bukinan di 1 i 2 Reinan originalmente tabata ún solo ròl na idioma hebreo, yamá Reinan. Ma méskos ku e buki di Samuel, e ròl di Reinan a bira dos ròl pa promé biaha den di tres síglo B.C. ora Tèstament Bieu a wòrdu tradusi na griego (LXX). E teksto griego a neselitá mas òf ménos dos bes mas espasio ku e teksto hebreo, pasobra idioma griego tin klinker, en kontraste di idioma hebreo antiguo.

Dor ku hebreo antiguo ta skirbí sin klinker, esakinan a wòrdu agregá na aña 600 A.D. Na aña 1516-17, Daniel Bòmber su Beibel hebreo a wòrdu imprimí na Venice pa promé biaha ku e dos buki di Reinan. Desde e tempu ei, nan a keda dos buki. Ma nos tin ku kòrda ku di bèrdad, 1 i 2 Reinan ta ún solo buki.

Pakiko e buki di Reinan a wòrdu partí nèt despues di 1 Reinan 22:53? Esaki ta mas òf ménos nèt meimei di e buki. Ta masha visto ku e divishon aki ta artifisial. Okozias tabata rei di Israel tantu den último kapitùlo di 1 Reinan komo den 2 Reinan 1. E buki no ta kaba ku morto di un persona. Elias a bai shelu den 2 Reinan 2. Su ministerio a kuminsá for di 1 Reinan 17. Dikon no a kaba 1 Reinan ku fin di bida di Elias? Kisas un motibu pa e divishon nèt aki ta pa demonstrá e unidat di e dos buki—pa mustra ku nan ta ún buki.

Nos lo konsiderá e bukinan aki komo ún solo buki!

## I. OUTOR DI E BUKI

No tin evidensia konvensiente ku tabatin mas ku ún outor. Ken por tabata outor di e buki di Reinan? Tin diferente idea ken e outor por tabata.

## A. JEREMIAS

Talmud hudiu ta haña ku kada buki di Tèstament Bieu mester a wòrdu skirbi pa un profeta. Talmud ta haña ku “Jeremias a skirbi su mes buki, e Buki di Reinan, i Lamentashonnan”. Esaki ta un pusibilidat interesante.

Tin argumentonan pro e punto di bista aki. Jeremias tabata un profeta ku a biba tantu promé komo despues di kaída di Yerusalem. Jeremias su nòmber no ta mensioná den Reinan (un kaso similar ku algun otro buki di Beibel, p.e. e evangelio di Juan). Ademas, 2 Reinan 24:18 - 25:30 ta kasi identiko ku Jeremias 52. Ta pusibel ku Jeremias a skirbi e buki hasiendo uso di diferente dokumento ku ya kaba a eksistí. Talbes despues di su morto un òf otro redaktor por a agregá algun punto di ménos importansia kompletando e buki manera nos konos’é.

Ma tambe tin argumento ku ta pinta un tiki skur pa ku e perspektiva aki. Jeremias a muda pa Egipto despues di kaída di Yerusalem (Jeremias 43:1-8). Nos ta haña e impreshon ku 2 Reinan 25:27-30 a wòrdu skirbí pa un persona lokalísá na Babilonia, na lugá di Egipto.

## B. PROFETANAN

Sin duda tabatin sekretarionan na e palasionan di kapital di tantu Juda komo Israel ku a tene rekòrt eksakto di e susesonan di kada reinado. Ma ta improbabel ku nan tabata esnan ku a kompilá e informashon pa e buki di Reinan manera e ta. Dikon nos ta yega na e konklushon ei? (1) E outor di Reinan ta franko tokante e pikánan di e reinan. Reinan—especialmente reinan ku no a teme Dios—lo no ke pa su sekretarionan skirbi kos negativo di dje. Asta nos lo por bisa ku e lo no a pèmití pa e sekretarionan tene rekòrtnan asina. (2) E buki di Reinan ta inkluí reinan di tantu Juda komo di Israel. Tin ora e dos nashonnan a bringa kontra otro. No ta probabel ku sekretarionan di un pais lo mantené rekòrtnan di tur dos pais.

Ma ta pusibel ku tabatin hende ku tabata tene rekòrt di e evehtonan di e reinan durante e kuater síglo ku nan a reina i por a kompositá e buki aki: profetanan. Profetanan sigur lo ta interesá den tur dos nashon hebreo, pasobra tur dos tabata desendiente di Abraham. Nan tabatin libertat pa skirbi di tur dos nashon tambe pasobra nan no tabata empleado di un òf otro rei. Nan mester a duna kuenta solamente na Dios.

Maske nos no sa presis kua otro dokumentonan outor di e buki di Reinan a usa, ta interesante ku otro tekstonan ta laga nos sa di dokumentonan skirbí pa profetanan:

E buki di Samuel e miradó (1 Krónikanan 29:29)

E buki di Natan e profeta (1 Krónikanan 29:29; 2 Krónikanan 9:29)

E buki di Gad e miradó (1 Krónikanan 29:29)

E profesianan di Ahias e silonita (2 Krónikanan 9:29)

E vishonnan di Ido e miradó (2 Krónikanan 9:29; 12:15; 13:22)

E buki di Semais e profeta (2 Krónikanan 12:15)

E skirbimentu di Jehú (2 Krónikanan 20:34)

E aktonan di Uzias i Ezekias skirbí pa Isaias e profeta (2 Krónikanan 26:22; 32:32)

Durante bida di Samuel, ta parse ku Bèt-èl, Gilgal, i Mizpa tabata sentronan di edukashon (1 Samuel 7:16). Durante era di Elias i Eliseo, e statnan di Bèt-èl, Gilgal, i Jéríko tabatin skolnan unda profetanan a wòrdu eduká (2 Reinan 2:1-5). E stanan aki tabata situá kasi nèt na e frontera entre Juda i Israel. E profetanan tabata sufisiente leu for di e sentronan polítiko (Samaria i Yerusalem), ku nan tabatin basta libertat pa skirbi loke nan ke. Tambe pasobra nan tabata situá na e frontera, nan por a haña informashon fásilmente for di e otro reinonan.

Ta pusibel ku e profetanan por a mantené relatonan por eskrito di kada rei. Talbes mas òf ménos na aña 600 B.C. e relato di e reinan a wòrdu kompilá i e buki kompletá ora e eventonan despues a tuma lugá, esta konkísta di Yerusalem (586 B.C.) i liberashon di Joakin (561 B.C.). Pues e buki di Reinan a keda kla entre 600 – 550 B.C.

## II. FECHA DI E BUKI

Ki fecha e buki a wòrdu skirbí? E buki ta duna relato di kaída di Yerusalèm na aña 587-586 B.C. Tambe e buki ta laga sa ku Evil-merodak, rei di Babilonia, a duna Joakin su libertat (561 B.C.). E evento ei a tuma lugá durante e 70 aña di eksilio despues di konkísta di Yerusalèm. Pues, e buki no por a wòrdu finalisá te despues di 561 B.C.

Un manera tambe ku nos por dedusí e fecha ku un buki a wòrdu skirbí ta dor di opservá ku siertu evento importante no ta menshoná den e buki. Outor di e buki di Reinan no ta skirbi mes tokante e pèrmít ku Siro a duna e hudiunan pa regresá bèk na nan pais. Si silencio di e outor riba e punto importante aki ta un indikashon ku esaki no a sosodé ainda, anto nos por dedusí ku e buki a wòrdu skirbi pa un persona ku a biba entre 586 i 539 B.C.

Ma tin un frase den e buki ku ta duna impreshon ku Reinan a wòrdu skirbí promé ku destrukshon di Yerusalèm. E frase ei ta “*te dia djawe*” (1 Reinan 9:13,21; 10:12; 2 Reinan 17:34). E frase aki ta referí na diferente echu ku no a kambia for di añanan pasá “*te dia djawe*” komo sifuera e nashon hudiu ta eksití ainda.

Pues, nos ta konkluí ku ta probabel ku sierto parti di e buki a wòrdu kompilá promé ku eksilio di Juda. Ma e buki no a wòrdu finalisá te 586-539 B.C. òf mas spesífiko entre 561 i 539 B.C.

### III. FUENTENAN DI E BUKI

For di unda e outor, a haña e informashon ku nan a usa pa skirbi e buki di Reinan? E buki ta mes ta laga nos sa di por lo ménos tres fuente: (1) Buki di e echunan di Salomon (1 Reinan 11:41); (2) Buki di krónikanan di e reinan di Israel (1 Reinan 14:19; 15:31; 16:5,14,20,27; 22:39; 2 Reinan 1:18; 10:34; 13:8,12; 14:15,28; 15:11,15,21,26,31). “Krónikanan” ta nifiká: rekòrt di eventonan koriente. Esei ta referí na e rekòrtan ofisial di e eventonan polítiko importante ku a wòrdu wardá den e biblioteka di palasio. (3) Buki di krónikanan di e reinan di Juda (1 Reinan 14:29; 15:7,23; 22:45; 2 Reinan 8:23; 12:19; 14:18; 15:6,36; 20:20; 21:17,25; 23:28; 24:5).

Kontenido di 2 Reinan 18-20 ta idéntiko ku Isaias 36-39...kasi palabra pa palabra. Ta parse ku e outor di Reinan a hasi uso di skirbimentunan di e profeta Isaias. Komo ku e buki di Reinan ta menshoná konkísta di Yerusalèm i hopi otro evento ku lo a sosodé despues di morto di Isaias, ta klaro ku e outor di Reinan lo a kopia Isaias su relato na lugá di vise versa.

### IV. PROPOSITO DI E BUKI

Outor di e buki di Reinan a biba durante e tempu di eksilio. Esnan ku lo lesa e buki, poko tempu promé a eksperensá destrukshon di Yerusalèm i kaptividat di e rei susesor desndiente di David. Nan lo tabatin preguntanan serio: “Dios a laga nos na kaya?” “Kon esaki por sosodé ku nos, komo pueblo di Dios?” “Marduk, dios di Babilonia, ta mas poderoso ku Jehovah Dios?” E eskritor su meta ta pa kontestá e preguntanan aki, mustrandu ku Dios no a fracasá, ku nan piká ta e motibu pa nan situashon, i ku Dios ta soberano mandando nan den eksilio.

Proposito di e buki di Reinan ta pa duna un relato históriko di e diesdos tribu di Israel for di morto di David te kaída di Yerusalèm, enfatisando eventonan importante for di Dios Su punto di bista i dunando Su evaluashon. E último relato tokante e nashon di nort, 2 Reinan 17:1-41, ta ilustrá bon e énfasis di e outor riba Dios Su perspektiva. Israel a wòrdu kastigá pa Dios pasobra tantu e reinan komo e pueblo a nenga reashoná positivo pa ku e spiertamentunan di Dios pa medio di Su profetanan.

E buki di Reinan ta konta Israel su historia. Pero e no ta kont’é di punto di bista di un historiadó sekular. Den e buki di Reinan, Israel su historia ta mirá dor di Dios Su mikroskop. Énfasis di e buki ta riba aspektonan spiritual, mustrandu ku bienestar di e nashon a dependé di obediensia i fieldat na Dios. Nota kon esaki ta bin dilanti:

#### A. FALTA DI ÉNFASIS RIBA ADELANTONAN POLÍTIKO

Klaramente e buki ke enfatisá eventonan ku ta importante for di *Dios* Su perspektiva. Outor di e buki no tin intenshon pa glorifiká Israel su heroenan pa motibunan patriótiko. E ta mostra solamente kon kada rei su relashon pa ku Dios tabata.

Omri tabata un di e reinan di mas importante di Israel. El a hasi Samaria kapital di e pais di nort, Israel, i a fortifik'é kontra e Sirionan. El a re-establesé komersia ku Fenisia. Tòg solamente ocho versíkulo ta konta henter historia di Omri (1 Reinan 16:21-28).

Jeroboam II su reinado tabata e “Era di Oro” pa Israel. Ma su lógronan ta kontá ku shete versíkulo so (2 Reinan 14:23-29).

Di otro banda, e outor ta pone hopi énfasis riba periodonan di revivamentu. Durante reinadonan di Ezekias i Josias en partikular tabatin revivamentu. E outor ta dediká tres kapitùlo pa reinado di Ezekias (2 Reinan 18-20) i dos pa rei Josias (2 Reinan 22-23).

## **B. EVALUASHON SPIRITUAL DI KADA REI**

E outor ta duna e impreshon kla (un impreshon korekto) ku e eksito spiritual di kada rei tabata mas importante ku su eksito politiko. E buki di Reinan ta mostra ku ni un rei di Israel (nort) a sigui Dios. Nan tur tabata kulpabel di piká, partikularmente idolatria ku Jeroboam a introdusí. E susesoran di Jeroboam a sigui den idolatria.

Entre e reinan di Juda tabatin algun rei ku a teme Dios. Josafat, Ezekias, i Josias ta sobresali spiritualmente, maske mayoria a faya riba un òf otro punto. Asa i Azarias (Uzias) tambe a pone énfasis riba e pueblo su relashon pa ku Dios.

Ripitidamente e outor ta duna evaluashon spiritual-moral di kada rei for di Dios Su perspektiva. El a skirbi ku e rei “*a hasi bon den bista di SEÑOR*” (1 Reinan 15:4,11; 22:43; 2 Reinan 12:2; 14:3; 15:3,34; 18:3; 22:2) òf “*a hasi malu den bista di SEÑOR*” (1 Reinan 11:6; 14:22; 15:26,34; 16:7,13,19,25,30; 21:20,25; 22:52; 2 Reinan 8:18,27; 13:2,1; 14:24; 15:9,18,24,28; 16:2; 17:2,17; 21:2; 23:32,37; 24:9,19). E énfasis riba e aspekto spiritual di kada rei ta indiká kla kiko prioridat di e outor tabata.

E outor ta usa Jeroboam komo un midí di maldat. Reinan ta kompará kun'e—si nan a sigui den su maldat si òf nò (1 Reinan 15:34; 16:7,19,26,31; 22:52; 2 Reinan 13:2,6,11; 14:24; 15:9,18,24,28; 17:22; 23:15). Igualmente, e outor ta kompará diferente rei ku David pa su rektitut—si nan a kana den kaminda di David si òf nò (1 Reinan 15:3-5,11; 2 Reinan 14:3; 16:2; 18:3; 22:2).

## **C. ÉNFASIS RIBA MINISTERIO DI PROFETANAN**

Kasi por bisa ku kada generashon tabatin su profeta. Diferente profeta ta mensioná den e buki: Natan (1 Reinan 1), Ahias (1 Reinan 11:29-38), un hòmbèr di Dios di Juda (1 Reinan 13), Jehú (1 Reinan 16:1-4), Elias (1 Reinan 17 - 2 Reinan 2), Eliseo (1 Reinan 19 - 2 Reinan 13), Mikaias (1 Reinan 22:7-28), Jonas (2 Reinan 14:25), Hulda (2 Reinan 22:14-20), i otronan.

Tambe nos mester mensioná dos hòmbèr di e yu hòmbèrnan di e profetanan, ku nan nòmbèrnan no ta mensioná. Un di nan a duna un mensahe pa Akab (1 Reinan 20:35-43) i e otro a ungi Jehu komo rei di Israel (2 Reinan 9:1-12).

E ministerionan di Elias i Eliseo en partikular ta destaká. E outor ta duna kasi 1/3 di e espasio den su buki pa kubri nan ministerionan. Kasi e elktor ta lubidá ku e ta lesa tokante e reinan di Israel i Juda ora e ta lesa di nan ministerionan. Ta bira komo sifuera ta nan storia!

## **D. STAIL DI SKIRBI TA UN STAIL PROFÉTIKO**

E buki di Reinan ta skirbí ku e mésun stail ku Isaias, Jeremias, òf un otro profetanan lo skirbi. E buki di Reinan tin e mentalidat di spiertamentu, reprimimentu, i enkurashamentu. Ta parse ku e buki di Reinan a wòrdu skirbí pa sirbi komo un spiertamentu pa tur esnan ku ta les'é—pa motivá nan pa biba manera e puebel di Dios mester biba, pa nan tin stimashon i ta deboto na Senor.

Dos Reinan 17 por ta un ehèmpel di esaki. Maske e ta konta historia di Israel su konkísta i deportashon, kasi por bisa ku e ta un sermon, splikando detayadamente ku Israel a wòrdu deportá pa motibu di nan piká.

## V. KRONOLOGIA DI E BUKI

Algun buki di Beibel no ta paga hopi atenshon na kronologia. Ma esei sigur no ta e kaso ku e bukinan di Reinan i Krónikanan. E outor ta hasi hopi esfuerso pa mantené su kronologia eksakto. Por ehèmpel, e ta konta di Asa su reino na Juda (1 Reinan 15:9-24) i ta sigui inmediatamente despues di esei, pa mantené e kronologia korekto, ta konta di reinado di diferente rei na Israel: Nadab, Baasa, Ela, Zimri, Omri, i Akab (15:9 – 16:34). Tur e reinan aki di Israel a reina durante era ku Asa a reina na Juda.

Tabatin un tempu ku teólogonan a haña ku e kronologia di Reinan i Krónikanan tabata inkonfiabel. Asta hudiunan ku a tradusí Tèstament Bieu na griego a lucha ku e kronologia di e buki, i a kambia algun sífra.

Ma na aña 1951, profesor E.R. Thiele a skirbi un buki entitulá *The Mysterious Numbers of the Hebrew Kings* (e numbernan misterioso di e reinan hebreo) ku a yuda studiantenan di Beibel komprendé e sífran di Reinan mas mihó. Awor en bista di esei, Reinan ta konsiderá un buki sumamente konfiabel i korekto.

Thiele a basa su estudio riba algun dokumento ku arkeólogonan a deskubrí ku a fiha fechanan pa eventonan historiko di Asiria for di 891-648 B.C. Tambe un lista di mandatarionan di Babilonia i Persa for di 747 te 332 B.C. a wòrdu deskubrí. Ptolemy (70 - 161 A.D.), un astrónomo, historiadó, geógrafo, i kronólogo, tabata e outor. Su informashon astronómiko a yuda konfirmá ku su informashon tabata korekto.

Entre otro, Thiele a proponé e siguiente puntonan pa yuda komprendé e kronologia di Reinan:

### A. TABATIN DIFERENTE SISTEMA PA KONTA AÑANAN DI REINADO DEN E DOS REINO.

Ku un sistema (nos lo yam'é Sistema A), e promé aña di e reinado a igualá ún (1) aña kompleto. Por ehèmpel, si e rei a kuminsá reina dia 24 di mei, anto e siguiente aña dia 24 di mei tabata kontá komo ún (1) aña kompleto. Un otro sistema (Sistema B) ku tabata usá pa kontamentu di añanan tabata kualke parti di un aña di e reinado tabata konsiderá ún (1) aña. Pues, por bisa ku si e rei a kuminsá reina dia 1 di desèmber, e luna ei ta kontá pa e promé ana. Dia promé di yanüari tabata kontá komo kuminsamentu di su di dos aña di reinado.

Segun Thiele, Juda a usa Sistema A for di 930 te 850 B.C., anto a usa Sistema B di 835 te 796 B.C., i despues a bin bèk na Sistema A pa añanan 796 te 587 B.C. En kontraste, Israel a usa Sistema B for di 930 te 800 B.C. anto a usa Sistema A pa añanan 798 te 722 B.C.

Pues, por sosodé ku loke Juda a konsiderá e di dies aña di reinado di Josafat, Israel lo konsiderá su di 11 aña di reinado.

### B. E AÑA KALENDÁR TABATA OTRO DEN E DOS REINONAN.

E reino Israel a kuminsá su aña ku luna di Nisan (Abib), e promé luna di e aña religioso. Esei ta mas òf ménos igual ku nos lunanan mart-aprel. Mientras tantu, Juda a sigui ku e sistema ku Salomon a inisiá. Tishri (Ethanin) tabata e promé luna di e aña sivil-sekular, e di shete luna di e aña religioso. Nos lunanan di sèptèmber-òktober ta harmonisá mas òf ménos ku e luna ei. Ta impusibel pa determiná pakiko e diferensia aki a surgi.

### C. TABATIN VÁRIOS BIAHA KU TABATIN KO-REINADÓNAN.

Na vários okashon, e prens susesor a kuminsá reina mientras su tata tabata reina ainda, na lugá di warda pa e tata muri promé ku nan a koron'é. Nos ta usa e palabra “ko-reinado” pa ekspresá ku mas ku ún rei a reina na e mésun tempu.

Pues, reinado di un rei tin ora a kuminsá oficialmente promé ku morto di e rei anterior. Ta parse ku esaki a soodé ku Akaz, ku a reina ku su tata Jotam pa 12 ana. Ezekias a reina huntu ku su tata, Akaz, pa 13 ana. Talbes yu di Ezekias, Manasés, a reina huntu ku Ezekias pa algun año.

Den un otro kaso, Amasias a bira rei di Juda na año 796 B.C. Azarias (Uzias), su yu, a kuminsá reina huntu kun'è na año 790 B.C. Ora Amasias a muri (767 B.C.), Azarias tabata e úniko rei. Anto Azarias a bira un leproso i mester a pone gran parti di su responsabilidatnan gubernamental un banda na año 751 B.C. Jotam a kuminsá reina e fecha ei huntu ku su tata. Jotam a muri na año 736 B.C. Jotam su yu, Akaz, a kuminsá reina huntu ku su tata na 743 B.C. Akaz a fayesé na año 728 B.C. Pues, pa un periodo di kasi tres año (742 - 739B.C.), tabatin tres rei na Juda.

## V. STRUKTURA I KONTENIDO DI E BUKI

E buki di Reinan i Krónikanan ta similar den algun aspekto. Ma nan ta otro den e echu ku Krónikanan ta konsentrá riba e reino di Juda so. E buki di Reinan so ta duna un relato di tur dos reino—Juda i Israel.

E reinan di Juda a bin for di solamente ún dinastia—dinastia di David. Esaki tabata konforme Dios Su promesa na David. Durante reinado di Atalía, dinastia di David a hera wòrdu likidá. Atalía a mata tur e yunan di rei, ku eksepsyon di Joas (2 Reinan 11:1-2).

En kontraste, Israel a eksperensia vários dinastia:

Dinastia di Jeroboam	931 - 909 B.C.
Dinastia di Baasa	909 - 885 B.C.
Dinastia di Zimri	885 B.C. (el a reina 7 dia so)
Dinastia di Omri	885 - 841 B.C.
Dinastia di Jehú	841 - 752 B.C.
Dinastia di Salum	752 B.C. (el a reina 1 luna so)
Dinastia di Manahem	752 - 739 B.C.
Dinastia di Peka	739 - 731 B.C.
Dinastia di Oseas	731 - 722 B.C.

Dios a destruí un dinastia tras di otro pa motibu di nan piká. E dinastia di Jehú a dura mas tantu. Di bèrdat no ta korekto pa yama otronan un dinastia, pasobra nan no tabatin susesor.

E por traha e siguiente skema general di e buki di Reinan:

- I. E REINO DI SALOMON - 1 Reinan 1-11  
Un periodo di 40 año.
- II. DOS REINO HEBREO - 1 Reinan 12 - 2 Reinan 17  
Un periodo di 253 año (975 - 722 B.C.).
- III. E REINO DI JUDA - 2 Reinan 18-25  
Un periodo di 136 año - 722-586 B.C.

Ripará ku  $\frac{1}{4}$  parti di e buki ta dediká na reinado di Salomon. Salomon tabatin un influencia grandi riba historia di e nashon di Israel. Pa motibo di Salomon su piká, Israel eventualmente a bira dos nashon (1 Reinan 11:9-14). Ora Roboam a bira rei Israel, pueblo di Israel a pidié pa redusí belasting. Ora el a nenga hasi esei, Israel rebeldiá (1 Reinan 12).

Profeta Ahias ta laga Jeroboam sa ku e lo bira rei di dies tribu. E tambe a spiert'è pa kana den kaminda di Dios (11:26-40). Jeroboam bira rei di e dies tribu di nort. Roboam a sigui reina riba Juda (su mes tribu) i Benjamin (12:21).

Roboam ke bai bringa ku e dies tribu pa pone nan someté. Ma e profeta Semaias a duna di konosé ku esaki ta e obra di Dios (12:21-24). Roboam a skucha e profeta.

Ma Jeroboam no skucha Dios, Esun ku a primintié e un dinastia permanentes (11:38) si e obedes'E. Na lugá di obedesé, Jeroboam a inisiá un sistema di idolatria pa preveni e pueblo di nort di bai adorá Dios na Yerusalèm. Ta parse ku el a pensa ku su pais lo mester tin su propio religion òf adorashon di Jehova Dios lo pone Israel i Juda uni komo ún nashon atrobe. Pesei el a pone un bisé di oro te na sùit, na Bèt-èl (na kaminda pa Yerusalèm) i un otro bisé di oro na Dan, te na nort.

E religion ku Jeroboam a inisiá no tabata kita Israel presis di adorá Jehova. Kisas su pensamentu tabata: Meskos ku Jehova ta sinta riba Su trono meimei di kerebinnan di e arka, asina Jehova invisibel lo ta eksaltá sintá riba un bisé. Pusíbelmente e tabata purba introdusí un kombinashon di religion, agregando na adorashon di Jehová algun asepekto di religionnan pagano di Kanaan (sinkritismo). Di tur manera, Jeroboam a pone Israel riba kaminda di e piká di idolatria.

For di e tempu aki, hopi biaha outor di buki di Reinan a kompará un òf otro rei ku sea David òf Jeroboam. Bon reinan ta kompara ku David. Mal reinan ta kompara ku Jeroboam.

Talbes ta pusíbel tambe pa traha un skema di e buki listando nòmbernan di reinan. Ma ta mas fásil pa lista nan.

REINAN DI JUDA			REINAN DI ISRAEL		
Roboam	1 Reinan 12:1 - 14:31	931-913	Jeroboam	1 Reinan 12:25 - 14:20	930-910
Abiam (Abias)	15:1-8	913-910			
Asa	15:9-24	910-869	Nadab	15:25-31	910-909
			Baasa	15:32-16:7	909-886
			Ela	16:8-14	886-885
			Zimri	16:15-20	885
			Omri	16:21-28	885-874
Josafat	22:41-50	872-848	Akab	16:29 - 22:40	874-853
			Okozias	22:51-53; 2 Reinan 1:1-18	853-852
Joram	2 Reinan 8:16-24	848-841	Joram	1:17 - 8:15	852-841
Okozias	8:25-29	841			
Atalía	11:1-21	841-835	Jehu	9:1 - 10:36	841-814
Joas	12:1-21	835-796	Joakaz	13:1-9	814-798
Amasias	14:1-22	796-767	Joas	13:10-24	798-782
Azarias (Uzias)	15:1-7	790-739	Jeroboam II	14:23-29	793-753
			Zakarias	15:8-12	753-752
			Salum	15:13-15	752
Jotam	15:32-38	751-736	Manahem	15:16-22	752-742
Akaz	16:1-20	742-728	Pekaia	15:23-26	742-740
			Peka	15:27-31	740-732
Ezekias	18:1 - 20:21	728-697	Oseas	17:1-41	732-723
Manasés	21:1-18	697-642			
Amon	21:19-26	642-640			
Josias	22:1 – 23:30	640-609			
Joakaz	23:31-34	609-608			
Joakim	23:34 - 24:7	608-597			
Joakin	24:8-17	597			
Zedekias	24:18 - 25:7	597-587			

Henter historia di e pais di nort, Israel, ta tristu. Ningun rei a biba pa Dios. Solamente dos di e reinan tabatin eksito polítiko i ekonómiko: Omri i Jeroboam II. Tabatin basta dramamentu di sanger—un persona ku ta aspirá na e trono ta mata esun ku ta reina. E último reinan di Israel espesialmente tabata un frakaso tras di otro. I tabatin un asesinato tras di otro.

## VI. OPSERVASHONAN DI E BUKI

Nos ke hasi diferente opservashon di e buki.

### A. MENSAHE DI E OUTOR

Ta parse ku e outor ta dirigí su mensahe na e eksiliadonan hudiu. Un gran parti di e fe di Israel promé ku eksilio tabata basá riba dos promesa di Dios: (1) Su eskoho di Yerusalem komo e sitio di adorashon, i (2) Su promesanan na David ku su dinastia lo permanesé. Dios a protehá Yerusalem—asta na maneranan sobrenatural (2 Reinan 18:13 – 19:37)—pa tantu aña. Ma awor, Yerusalem i e tempel ta destruí. Dinastia di David a permanesé pa mas ku tres siglo. Ma awor, no tabatin rei na Yerusalem i e sucesor ku derechu pa sinta riba trono na Yerusalem tambe ta den akptividat. Dios a frakasá? E no por a kumpli ku Su promesanan? E diosnan di Babilonia tabata mas poderoso ku e Dios di e hudiunan?

Outor di Reinan ta konta e storia pa muestra ku Dios no a frakasá. Ta pueblo di Dios ku a hasi piká (idolatria en partiular). Historia di e pueblo hebreo ta prueba ku Dios santu ta kastigá nan pa kousa di nan desobedensia. “*Nan a hasi malu den Mi bista i a probokáMi na rabia for di dia ku nan tatanan a bin for di Egipto te dia djawé*” (2 Reinan 21:15). E sermon aki sigur tin komo meta pa pueblo di Dios repintí, bandonando nan piká, i konfia Dios.

Final di e buki ta un enkurashamentu pa e pueblo hudiu. Maske nan ta katibunan den un tera straño, Dios a kòrda Su promesa pa ku David. Dos reinan 25:27-30 ta laga sa ku maske Joakin, desendiente di David, esun ku tin derechu di sinta riba trono na Yerusalem, ta den eksilio, Dios a kòrda riba dje i a sak’é for di prizon!

### B. IDOLATRIA DI PUEBLO DI DIOS

Manera nos a mensioná ya kaba, e buki di Reinan di bèrdat ta un sermon. Maske tin ora e outor ta mensioná lógronan polítiko, militar, i ekonómiko, esei no ta su prioridat. E ta muestra ku piká, idolatria en partikular, a okashoná Dios Su kastigu.

Ora Israel tabata den desierto, Dios a instruí nan pa destruí tur forma di idolatria ora nan drenta e Tera Primintí (Deuteronomio 12). Ma nan no a obedesé.

E buki ta muestra ku idolatria entre e pueblo di Dios a kuminsá ku Salomon. E rei aki, maske e tabata esun mas sabí, a hasi diferente kos bobo. Entre otro el a kasa ku shenes di muhé pagano i a fasilitá nan adorashon di nan diosnan (1 Reinan 11:7-8). Salomon su esposanan a logra “*hasi su kurason desviá pa sigui tras di otro diosnan...*” (1 Reinan 11:4). Kastigu di Dios tabata e resultado. Esei tabata loke a okashoná e kiebro entre Israel i Juda.

E outor ta muestra ku henter e historia di e nashon nort di Israel ta manchá ku un ehèmpel tras di otro di idolatria. El a kuminsá ku adorashon di e bisénan di oro na Bèt-èl i Dan ku Jeroboam, promé rei di Israel, a introdusí.

Sin duda e kompetensia entre Dios i Baal ku Elias a introdusí den 1 Reinan 18—kua Dios lo kontestá ku kandela, probando ku E ta Dios—ta un teksto ku ta destaká riba e punto aki. Pueblo di Israel tabata konvensé na e momentu ei sigur ku “*SEÑOR, E ta Dios; SEÑOR, E ta Dios*” (18:39).

Ma na Juda tambe tabatin problema serio ku idolatria. Maske Yerusalem—e lugá designá pa adora Dios—tabata lokalísá na Juda, tòg nan no a trata ku e problema di “lugánan haltu” unda adorashon di diosnan falsu a tuma lugá. Rípidamente e teksto ta mensioná kiko diferente rei a hasi tokante e lugánan haltu (1 Reinan 11:7; 14:23; 15:14; 22:43; 2 Reinan 12:3; 14:4; 15:4,35; 16:4; 18:4,22; 21:3; 23:5,8-9,13,15,19-20). Segun e lista aki, dos rei so a hasi bon, dehasiendo di e lugánan haltu, i insistiendo ku pueblo di Dios mester adorá na Yerusalem



so, Ezekias i Josias. Otro reinan a hasi bon den bista di Dios ma a pèrmití e lugánan haltu pa sigui ku nan adorashon. I tabatin rei ku a partisipá mes den adorashon na e lugánan haltu.

Dios a kastigá Su pueblo mandando nan den eksilio na un pais unda tabatin dios falsu na kantidat grandi. Ta parse ku esaki a “kura” e hudiunan di idolatria, pasobra ora nan a regresá na nan pais for di eksilio, nunca mas nan a adorá ídolonan manera nan a hasi den pasado.

Nos no por lesa e buki di Reinan sin kòrda e palabranan di Proverbionan, “...*kaminda di e transgresornan ta duru*” (13:15). Apòstel Pablo a bisa, “...*pago di piká ta morto...*” i “*No gaña boso mes: Dios no ta laga hasi bofon di djE; pasobra loke un hende sembra, esaki tambe e lo kosechá*” (Romanonan 6:23; Galationan 6:7).

### **C. KUMPLIMENTU DI PROFESIA DEN E BUKI**

Deuteronomio 18:9-22 ta laga sa ku por saka afó presis ken ta un profeta bèrdadero di Dios. Profesianan di un profeta bèrdadero lo wòrdu kumplí.

Ku frekuensia den e buki di Reinan tin ehèmpelnan di profesianan ku a wòrdu kumplí (1 Reinan 11:29 – 12:20; 13:1-6,20-26,32; 15:29; 17:1-7; 18:16-39,44-45; 21: 20-24; 22:17-36; 2 Reinan 1:4-17; 3:15-27; 7:1; 9:26,36; 10:17). Tin hopi otro ehèmpel ku nos no a lista. Hopi di e milagernan ku profetanana a hasia konfirmá nan profesianan tambe.

### **D. PATRONCHI DI BIOGRAFIA DI REINAN**

Outor di e buki a usa un plan konsistente pa deskribí kada rei. Tin algun variashon; ma en general, e ta sigui e mésun patronchi.

Introdukshon di e rei. (1) Promé e outor ta laga sa ku tal i tal rei a kuminsá reina. (2) Edat di e rei na komienso di su reinado ta mensioná. (3) Largura di reinado. E añanan total ta inkluí e añanan ku e rei por a eksperensia un “ko-reinado”—reinando huntu ku su tata òf huntu ku su yu susedor. (4) Pa reinan di Israel, normal kapital di e rei ta mensioná. (5) Mayor di e rei por ta mensioná. Pa reinan di Juda, nòmber di mama di rei ta duná, talbes pa reflehá e kontinuidat di e famia di David. Di otro banda, normal nòmber di e tata ta mensioná pa e reinan di Israel. (6) Evaluashon moral-spiritual ta sigui. E outor simpelmente ta bisa ku e rei a hasi bon òf malu den bista di SEÑOR. E outor ta siguí elaboranado riba esaki, demonstrando ku su evaluashon ta korekto.

Na final di e deskripshon di e biografia kortiku di e rei tin un mensahe di konklushon. (1) E outor ta laga sa unda por haña mas informashon. Tin ora e ta agregá un òf otro lógro òf evento interesante durante e reina sin elaborá mashá. (2) Partisipashon di morto. Pa e reinan di Juda, mas tantu esaki ta siguí pa un komentario tokante su entiero. (3) Partisipashon ken e susedor tabata. Tantu pa reinan di Juda i Israel, nòmber di e yu susedor ta mensioná, ku eksepshon di kasonan ora un otro persona ta tuma poder na un manera inkorekto.

Den kaso di Atalia—e únika reina mensioná—e outor ta ignorá e patronchi aki, dor ku e ta mir’é komo un probechadó, no e reina legal.

Meimei di e introdukshon i konklushon, e outor por inkorporá un variedat grandi di informashon. Hopi biaha sikiera ún insidente importante—manera akshon militar—ta mensioná.

### **E. SALOMON**

E era di Salomon su reino tabata e periodo di mas prosperidat ekonómiko i mas luhoso di historia di Israel. Ma apesar di tur su konosementu i rikesa, den hopi sintido Salomon tabata un frakaso. Nos no ta bai tuma tempu pa mira tur su frakasonan. Ma nos lo mensioná ún punto ku ta parse inkomprendibel pa nos.

Salomon su harem a surpasá loke asta reianan pagano di oriente a konsiderá apropiá. Ma talbes por splika tur e esposanan i konkubinanen debí ku Salomon tabatin aliansa ku tantu nashon. Ta parse ku tabata normal e tempu ei pa reinan seya un aliansa dor di duna e otro rei un esposa. Pues, Salomon su multitut di esposa i konkubina por reflehá prosperidat polítiko internashonal.

## F. ELIAS I ELISEO

Nos no por klousurá e introdukshon aki di e buki di Reinan sin menshoná algu en korto di e ministerio di Elias i Eliseo. Si no tabata pa e buki di Reinan, nos lo no sa tokante nan ministerio. Maske hopi profeta ta menshoná den e buki, ningun profeta ta mas menshoná ku Elias i Eliseo. Mayoria di e kontenido di 1 Reinan 17-22 i 2 Reinan 1-9 ta dediká na Elias i Eliseo

Estudionan ekstensivo a wòrdu hasí di nan persona i nan ministerio. No ta nos intenshon pa hasi esei aki. Ma nos ke menshoná algun punto si di nan.

Elias tabata úniko den su aparensia. E lo a parse un kampsino rústiko, pañanan ku mayoria hende lo haña inkomfortabel i raro, talbes ku kabei i barba largu. Elias no a preocupá ku su aparensia. Elias tambe tabata úniko den su karakter. Su kurashi tabata ekstraordinario. E so a reta tur e 850 saserdote di e religion falsu di Baal riba Seru Karmelo. Su konfiansa den Palabra di Dios tabata firme. E diosnan di Fenisia (ku rei Akab a importá huntu ku su esposa, Jezabel) tabata diosnan ku supuestamente tabata responsabel pa yobida. Pa mustra ku Dios ta superior, konfiando palabra di Dios, Elias a proklamá den kara di rei ku lo no tin yobida pa 3½ aña. Ademas, Elias tabata zelo pa Señor.

Dr. Kitto a bisa, “Tabatin dos sorto di profeta: profetanan di echunan, i profetanan di palabranan. Sin duda Isaias tabata esun mas grandi den e último grupo. Den e promé grupo, no tin mas grandi ku Elias.” Nos no sa di asta un teksto ku Elias a skirbi. Su akshonnan a papia pa nan mes! Elias tambe tabata un hòmber di milagernan. E relato bíbliko ta menshoná hpi milager ku el a hasi. Su ministerio tabata un ministerio di reformashon i revivamentu, yamando e pueblo di Israel bèk na Señor.

Eliseo tabata otro for di Elias. En kontraste di Elias, e tabata pelon. Eliseo tabatin sintimentu fuerte pa ku su famia. Ora Elias a yam’é pa sirbi Señor, mes ora e tabata kla pa hasi esei. Ma el a hasié di tal manera ku el a demonstrá amor familiar (1 Reinan 19:20). Despues ku Elias a yam’é, Eliseo a sirbi Elias umildemente (2 Reinan 3:11). Un otro ehèmpel di su umildat ta ku e no a buska fama pa su mes òf e regalonan di Naaman por a dun’é (2 Reinan 5). Eliseo tambe tabata un hòmber ku dese ardiente pa Dios. Ora Elias a hasi’é pregunta loke e ta deseá, Eliseo a pidi “*un porshon dòbel di bo spiritu*” (2 Reinan 2:9). Eliseo tambe tabata un hòmber di gran fe i a hasi hopi milager. Di bèrdat, el a hasi dòbel e kantidat di milager ku Elias a hasi. Eliseo tambe tabata un hòmber di kurashi, kondenando rei Joram den su kara (2 Reinan 3:13-14).

## Literatura Konsultá

- Archer, Gleason L. Jr. *A Survey of the Old Testament Introduction* (Chicago: Moody Press, 1994), p. 317-326.
- Baxter, J. Sidlow. *Explore the Book* (Grand Rapids: Zondervan Publishing House, 1960), vol. 2, p. 83-161.
- Demaray, Donald E. *A Layman's Guide to Our Bible* (Los Angeles: Cowman Publishing Company, 1964), p. 81-85.
- Dillard, Raymond B. & Logman III, Tremper. *An Introduction to the Old Testament* (Grand Rapids: Zondervan Publishing House, 1994), p. 149-167.
- Schultz, S. J. Tenney, Merrill C. ed. *The Zondervan Pictorial Encyclopedia of the Bible* (Grand Rapids: Zondervan Publishing House, 1976), vol. 3, p. 809-823.